

編號 1 號

【避暑】葉美伶原作

番婆樹¹榮榮，細細蕊个花開都鬧借借，日頭緊來緊烈，企在樹下看往上，晟都人擘毋開目，耳公聾不時聽得著樹頂个蟬，炎炎炎炎咿～～炎炎炎炎咿～～放勢緊唱這季節正有个歌曲。

逐年這下係佢盡樂暢个時節！等學期結束，放寮該滿，阿爸會送佢轉莊下同講客話个阿爹阿奶培養感情。戴在莊下無冷氣，毋過，闊闊个瓦屋當涼，堵著暗晡頭特別熱个時節，阿奶會擎支扇同佢撥涼，撥啊撥毋多知佢斯睡落覺咧。老屋面前有當大當闊个禾埕，阿奶講頭擺係晒穀用个，這滿穀收成斯直接載去穀倉焙，毋使日頭晒，也毋驚下晝頭个西北雨。阿奶講著頭擺艱苦个日，成半下還會偷偷掙目汁。這下禾埕既經變做停車場，下把²係晒菜脯、晒鹹菜乾个好所在，也係吾這兜細人个遊樂場。

大門口種有一頭蓮霧樹，逐年總係打都結結結，歸樹頂噹噹吊吊。逐年這時節斯像同佢講：「歡迎光臨！佢為著你煞猛結子，斯像阿爹阿奶心肝肚捻捻个愛，望子孫轉來。」屋面前還有

一條圳溝，歸日泉水流流流流，這滿還捉得著蝦公，阿奶講準講天早也毋怕，泉水分偲个恩情偲愛珍惜。在烈烈个日頭下盡清涼个享受係泗水、覓蜆、捉蝦公、搞水相戽，在收成過後个田項燿番薯，搞騎馬相戰、份家啦，吾這兜細人搞都歡喜轟天，也係佢避暑快樂个生活。

一瞞目，佢讀小學三年生咧，阿姆安排在避暑去補習。逐日關在冷氣間肚，歸個人像拉絛³个弓，身材變都又高又瘦，人也較白淨咧，歸日像極樂个樣無閒濟借⁴。佢已想該有阿爹阿奶个莊下，想蓮霧還等佢去摘，想隔壁鄰舍个細人伴等佢共下搞园人尋。

阿爸講偲客人已重視晴耕雨讀个門風，將讀書同耕種看做係盡重要个兩件事。因致，愛出頭天，讀書第一重要。毋過，阿爸也會輒輒撥時間，載歸屋家大細轉去看阿爹、阿奶。其實，佢盡毋盼得个係，無法度逐日聽著阿爹、阿奶用客話講古分佢聽个燒暖。

¹ 番婆樹：音 fan+ poˋ shuˋ；鳳凰木。

² 下把：音 haˋ baˋ；有時候。

³ 絛：音 henˋ；緊。

⁴ 無閒濟借：音 moˋ hanˋ ziˋ ziaˋ；非常忙碌的樣子。

臺中市 110 年語文競賽複賽客家語朗讀文章國小學生組（大埔腔）

編號 2 號

【鬧熱个落雨天】曾菁怡原作

鬧鐘鈴鈴鈴響咧！大嫲聲喊佢遽遽趺床，過勒床斯會赴毋掣去學校讀書哩啲。佢目西西伸手搯撇鬧鐘，過橫落軟習習个眠床頂，毋盼得同佢分開。咦！毋係天光咧？外背仰脣還係暗摸胥疏？探頭看出去，原來係天公派烏雲使者來通知吾等——愛落雨咧！

有人認為落雨天已麻煩，出門愛著水衣，無斯擎遮，無細義衫褲又會淋去溼漉漉，去哪位都無方便。學生盡惱無法度出去打球、搞寮，一下課先生斯掌緊，麼人都使毋得出去逐雨，所以見看啊著落雨，大家斯唉唉喲喲，眼盯盯看雨水占領歸個運動埕，實在還慍悴哦！

毋過，落雨天對佢來講嗰係已鬧熱个日。朝脣一出門，街路做下塞淦淦个車，這片嘩嘩；該片叭叭，像久無見面个朋友相賽招呼，大家尖共下講起久無見面个思念。該兜行路个人，擎緊一支一支各色个遮花，雨水一滋潤，斯開出五彩个花蕾，行來行去像在比麼人个花較靚。你係聽較真兜，該雨水落在車頂、屋頂、水窟抑係樹葉个聲音做下無共樣，有高，有低；有大聲，有細

聲，像唱歌分你聽个樣。成半下，雷公還會用曠燼打燈光，用響雷伴奏，你講，係毋係已生趣？

佢盡好在落雨天打早去學校，因為該兜平常時固核核个蜎螺、蟲蟪全部都會出來搞水。學校牆頭係膏水泥个，泥壁頂个溜苔青里里，落雨該下，蜎螺趟上趟落陣打陣，有兜比賽看哪隻趟較遽，有兜彎來幹去做畫圖个藝術家，有兜停在牆頭面享受逐雨个清涼，逍遙自在。

落雨天出來搞寮个蟲蟪盡好膽，衫褲無著斯緊拚拚走出來搞水，溝壩肚浪浪滾个水流已刺激，幾尾蟲蟪分水沖過去還會扭來扭去，暢都奈毋得。有个蟲蟪大擘擘趟到路頂來，較砸身个還使得趟倒轉去；較嫚个將就橫在路徑頭，分天公做主咧！

鬧熱个落雨天，有人懊惱，有人歡喜，天公無法度分逐個人納意，孤孤偲自家改變想法，不管麼个天都係當好个天。

臺中市 110 年語文競賽複賽客家語朗讀文章國小學生組（大埔腔）

編號 3 號

【阿姆个鹹糜】黃旭霞原作

起屋个師傅同做小工个叔姆，在禾埕項無閒濟借。師傅交代叔姆愛同磚淋濕來起屋之時正好用，阿姆看叔姆無閒在該攪沙，走去拿水管來淋磚，佢斯跔阿姆在脣口搞水。

阿爸上班無法度逐日轉屋家，屋家大細項事全部係阿姆一肩揸，日日做到兩頭烏，吾等毋知頭天个三姊妹，想著會有新屋好戴，有自家个間肚好歇，心肝肚不時因緊歡喜个心情。成半下阿姆會喊吾等來搵手搬磚、疊磚、攞水、攞茶……，佢同兩個阿哥做下會來搵手。

下晝兩點零，阿姆在灶下無閒，耳公聽著阿姆擎菜刀、切豬肉、香菇、芹菜……洗鑊頭、開瓦斯……，哇！阿姆愛煮點心咧！佢恬恬趑去灶下看阿姆煮點心。阿姆對豬油鑊項挖兜豬油，放落鑊肚跔緊斯放浸過水个蝦蜆同香菇來敲香，焗出香味了後斯放切好个麻竹筍，炒下正放洗淨个米共下炒，浸過蝦蜆同香菇个水也無打爽，倒兜豆油了後，滾水倒落去斯起勢煮糜咧！差毋多半點零鐘糜斯煮好，毋過糜忒燒，阿姆將歸鑊个糜兜落大面盆肚沾，分糜較遽涼。

「阿霞！搵手拿碗同筷放到禾埕个矮桌項。」

擺好碗筷，阿姆斯喊吾等三姊妹入去邊脣个矮屋肚搞。阿姆講：「師傅食點心，細人毋好坐在脣口看人食，恁泥無禮貌。」走入屋肚佢拿細凳頭來墊腳，對細窗門偷看師傅厥等食點心，老師傅添第三碗，做小工个叔姆也添第二碗，吾心肝肚當急，肚屎咕嚕咕嚕个聲也毋會輸人。阿姆煮个鹹糜恁大鑊斯快會無咧！吾个嘴毋知幾時翹到半天高。

佢遽遽走去灶下，該央時阿姆去收該伸無兩碗个鹹糜，阿姆喊佢去搵手收碗筷，佢無已甘願慢慢行慢慢做，碗筷放到灶下幹頭斯愛走！阿姆喊講：「去拿碗來張。」原來阿姆煮好鹹糜，早都有留兜分吾等三個細人食。

佢遽遽拿碗去張糜，這下斯顧毋著頭先北北个面咧！大口囑去飽餵餵！

一碗好食个鹹糜，有香菇、蝦蜆、竹筍、腩肉、芹菜，盡重要个係有阿姆惜子女个心。還細佢食毋出來，這下自家做阿姆咧！正感受著這一碗鹹糜个好味瑞！

【阿爹个杭菊】黃麗芬原作

毋知對哪久起勢，阿爹逐日都在該等天光。

天一光，阿爹斯緊拚拚想愛出門去，像愛趕去赴約會个樣恁歡喜。佢成半下用行个，成半下騎鐵馬，斯好滿哪緊行。佢毋會像別儕恁泥逐朝脣在 LINE 群組傳貼圖問早，單淨會去廟項拜喏，在廟前个大樹下看人行棋，斯算有打卡報到咧。厥盡尾一站，係在阿奶盡好去个菊花田項坐緊看花、看樹、看人、看鳥，恬恬做無聲个交流，看過願咧自然斯會轉屋，這係佢簡單生活个快樂。

有一日到臨暗咧阿爹還吉轉屋，這係自從都毋識發生个事。歸屋家人著急著命緊張去無結無煞，歸莊頭滿哪去尋，盡尾在菊花田項尋著佢。阿爹哪會知吾等有幾愁慮，顛倒老蟹吊頸——尋無頭緝¹緊問：「菊花仰脣做下無撇咧？」毋管吾這兜仰脣解說，佢都毋信，單淨譴滋滋²緊罵講：「恁花舌！恁耗槩！」原來，珍惜个東西毋見撇之時，理智个線路也會斷撇。

「阿爹，你看！阿奶同菊花——兩蕊花。」一轉到屋家，佢

遽遽去阿爹个間房拿出佢放在拖箱个相片，這係佢同阿奶兩儕在銅鑼九湖个菊花田項翕个，也係吾兩子阿爹个祕密。這張相片雖然有兜褪色，毋過還看得清歸田坵个菊花一蕊一蕊，有白也有黃，厥等个笑容同大自然个靚各有錫人个所在，無想著這嘎係阿奶過身了後阿爹唯一个回憶同紀念。吾心肝肚知：「『情字這條路』个歌，阿爹怕係仰脣唱都唱毋會煞咧……。」

對該日起勢，吾等胚想阿爹交著一個新朋友咧，安做——「阿茲海默先生」。佢毋知係對哪位來个，三不二時會來尋阿爹，來个時節會帶核記憶个梓布做等路送分阿爹，大埕、細埕、麼个形款都有。厥兩儕共下个時間慢慢變長，緊來緊鬥搭，阿爹毋係奈到毋知好轉屋，斯係買一千擔共樣共樣个東西轉來，還過重複緊尋：「阿奶呢？」恁泥个情況實在分人愁慮，將恁泥吾等準備一個名牌結在阿爹个面衫項，名牌上背寫緊阿爹个名同屋家个電話號碼，詐意同阿爹講：「恁泥，阿奶斯會同你共下去看花咧！」真真假假，有夢盡靚，希望相隨。

總會有天光！偲等愛同盡遠个距離——「想念」拉俁來，同盡靚个記憶——「阿奶」好好囤在心肝肚。

¹ 老蟹吊頸——尋無頭緝：音 lo` hai` diau` giang`——cim` mo` teu` tag`；吊頸，指的是上吊。尋無頭緝，指找不到頭的部分細綁，引申為做事找不到重點，摸不著頭緒。

² 譴滋滋：音 kien` zii+ zii+；形容生氣的樣子。

【蘋果】徐姿華原作

在臺灣，蘋果係盡無見奇个水果，一年四季儘採哪個果子攤都看得著，毋過，蘋果个魔力，係自細斯深深種在吾心肝肚、囵入吾腦膈肚个。

吾等三姊妹一個續一個出世，屋家个開銷日視日增加，阿爸同阿姆參詳了後，決定放撇屋家該垵出息無多个薄田，出外食頭路，為著賺較多兜錢，阿爸應¹著水壩工程个十輪牯運轉手，愛配合工地時間出車，一個月正兩日好歇睏忒等。

阿爸當珍惜同屋家人共下个時間，放寮前一日下班，星夜趕轉來，趕到屋家既經轉點咧，吾等早都睡去屎肱孔孔，阿爸會輕手輕腳來間肚巡吾等，看看有睡好無？有踢被無？佢會同睡去橫架直架个吾等，拗正來睡、同吾等蓋被，還會咬吾等个面頰卵，分阿爸短短个鬍鬚刺去，又癢又疾又虐削，目睡覺玄玄風分阿爸吵醒現起雷迫，目摸目罅嚶嚶滾嗽眇，阿姆斯特會嗶嗶嗶嗶，喊佢莫滅人，阿爸會牙牙蛇蛇²講：「恁久無看著咧，佢當想吾心肝妹啊！」還當愛睡个佢，一下又迷迷痴痴睡撇，毋過夢中仰脣鼻著

¹ 應：音 rhin+；允諾，此文中指「找到」。

² 牙牙蛇蛇：音 ngaˊ ngaˊ shaˊ shaˊ；不正經。

香香甜甜當好鼻个味瑞呢？

第二日朝脣跣床，枕頭脣有一粒又紅又大粒个蘋果，該香香个氣味斯係昨暗晡目睡覺鼻著个，該大蘋果還錫人哪！係阿爸轉來咧！佢一恸真，遽遽跳落眠床，盲赴著鞋斯飆緊出去，阿爸坐在飯桌前牙噉噉³看佢，佢一下跳上阿爸大腳髀項坐核，兩隻手纏核阿爸个頸根，同阿爸使妮。阿姆捧核一鑊燒爇爇个糜行過來，看著斯笑笑講：「還使妮哦！遽遽去洗嘴洗面好食朝咧！」佢還係毋肯落來，拈核阿爸像一隻無尾熊，阿爸笑去嘿黑滾，企跣來同佢摘去洗身間洗嘴洗面。

阿爸知佢好食蘋果，逐擺做事轉來，總會買蘋果放在吾枕頭脣，分佢使得發一個香香甜甜个夢。佢知阿爸惜佢，佢也知佢當愛阿爸。該蘋果个香氣、靚靚个外型同脆脆甜甜个好味瑞，毋知對哪時既經刻入吾个心肝肚，該蘋果斯係阿爸愛佢、惜佢个印記。

³ 牙噉噉：音 ngaˊ ve+ veˊ；露齒笑。

【賣菜】謝惠如原作

記得讀三年生該下，屋家人口多，食、用開銷也大，阿姆除了做田事還愛治理屋家人个三餐，斯利用屋側角該埕空地來種菜，種啊種，菜嘅多都食毋去，高不將載去街路賣。

九月冬十月禾割撇了後，一個奈日阿姆喊偌跲佢去搨賣菜，到菜市場个路脣，阿姆撐好鐵馬，將後架疊都尖起來个角菜，落十外抓¹落來喊偌在該掌緊賣，無講橫無講直自家斯隨載去街路迴迴轉賣咧，摜偌²一個人在該呆呆，毋知愛仰結煞正好。

偌本來面皮斯薄，見看著毋熟事个人斯會面紅濟借，莫講愛喊人買菜，無結無煞个偌，敗勢去頭犁犁，全毋敢探起來看人，好得隔壁賣番薯个老伯姆看偌恁恬又畏事，笑笑講：「細阿妹，毋使驚，你做你大聲喊賣菜，人若聽著斯會撇轉來看你賣麼个，無定著有佢想愛买个菜，鴨嫲嘴愛罔吮正有好食，來！偌喝分你聽：『來唷！來買番薯唷！好食个番薯又粉又甜，包你食了還會倒轉來買唷！』」聽著老伯姆个喝賣了後，偌斯膽膽試喊：「來唷！來買菜哦！一抓十個銀貳等。」正喊啊煞，一個阿姨聽著隨

停落來買，還褒偌恁乖恁曉得。聽著厥个安謐，偌暢都緊喝緊大聲，行過吾面前个人，十個有八個大體會停落來同偌買菜，無幾久斯賣撇咧，分偌試著賣菜一屑都毋會難。

冬下頭日短，臨暗放學轉到屋家，鞋一脫衫一換，隨走去菜園同阿姆搨摘菜。暗晡頭食飽夜了後，同阿哥兩個人擇菜、秤菜，吾等負責个事頭，除了將一頭一頭有黃葉同燥葉个菜蓋³愛擘撇以外，還愛將有泥个菜蓋搗搗嚟，整理清淨好勢了後，一抓一抓秤畀平重正綑起來。阿姆不時交代吾等：「有東西好賣，斤兩定著愛秤罉，雖然正十箍八角又乜係錢，秤頭斯係路頭，毋好去批著人。還有，賣食个東西，自家愛敢食正好拿去賣人。」這兜話偌全記在心肝肚。

賣菜雖然係一種小生理賺毋成錢，也無麼个大學問，毋過對這擇菜、賣菜个過程中，分偌學著已多做人做事个道理。

¹ 落十外抓：音 log` shib` nguai` za+；解下十多把。

² 摜偌：音 biang+ ngai~；丟下我。

³ 菜蓋：音 coi` hab^；老菜葉、外葉。

編號 7 號

【像戇牯个天才】葉秋菊原作

「人不可貌相，海水不可斗量」用這句話來講阿明牯，實在當適當。佢乜相信天公同你關撇一扇門，定著會替你打開另外一扇窗。

見擺愛重頭分班該下，吾心情斯像老鼠跌落米缸肚，一重歡喜一重愁，歡喜个係使得熟事新朋友，愁个係毋知會有牛頭馬面同佢分共班無？記得開學該日，遠遠看著一個手癟癟腳跛跛个細俵行入教室肚，該個人頭昂昂，嘴弛弛¹緊行緊笑，看覓來戇當戇當个樣，佢胚想佢怕係行毋著教室，愛去隔壁个資源班正著啊！。

該個細阿俵恁堵好坐在吾隔壁。先生特別紹介這個細俵，講佢安做張忠明，手腳毋方便，愛勞擾坐厝脣項个人，發揮同學愛，搵手照顧。張忠明？佢恠著係當聰明，險險笑出聲來，一恠著新个一年愛同佢比比坐，面都孬撇²一析。佢頭側側偷睇佢，欸！生來白淨白淨算係已清秀，毋過透日口涎水澹澹汀汀，將胸脯前圍緊該條弛涎帕³，汀都潦潦潦，分人看著目汁都會跌出來，

¹ 嘴弛弛：音 zhoi` rhe` rhe`；嘴咧得開開的。

² 孬撇：音 fe` ped`；歪了。

³ 弛涎帕：音 rhe` lan+ pa`；圍在脖子上吸口水的圍兜。

同情心在吾心肝肚慢慢翻轉，佢慢慢幹轉頭同佢笑下，試著佢乜已得人惜哦！

吾該班个鱸鰻頭⁴總係撩撩刁刁，奈冬瓜毋何斯捉瓠來捋毛，看忠明好欺負，斯學佢行路孔孔翹翹个樣相，無斯同佢捏下屎肫，好性體个阿明牯詐無事人，在人城，佢一肚懊惱搭緊拳頭嫵，當想行前去替佢出頭。

阿明牯當自重，同吾等共樣上課，共樣寫作業，斯寫字較食力，較摸掌⁵忒等，學生該當愛做个本分，佢毋識懈怠過。有一日上數學，先生出一個題目難過上天，吾頭那恠都必撇⁶也恠毋出來，大家額結結無人曉算，哪會胚想著阿明牯佢毋使兩分鐘斯算出來。大家目珠擘都大嫵粒，焮鏢⁷講到鉢乜無人愛信，戇牯仰會變精咧呢？原來佢係一個天才啊，打先緊恠著佢係戇牯个佢敗勢都面紅濟借，還想尋個空鑽入去！

見擺看著搞都昏天暗地个吾這兜，同拿緊隨身聽恬恬聽英文，嘴頂迪迪突突⁸背出一大串英文單字个佢，自家試著會面紅，實在天爭地啊！人講：一枝草一點露，天公係公當个，雖然無分佢健全个身體，毋過賜佢聰明个頭腦同上進个心，在未來个路項，毋使替佢懊惱替佢愁咧。

⁴ 鱸鰻頭：音 lu` man` teu`；頑皮的男孩。

⁵ 摸掌：音 mo` so`；動作緩慢。

⁶ 必撇：音 bid` ped`；裂開。

⁷ 焮鏢：音 pu` lo`；用生鐵鑄的炊具。

⁸ 迪迪突突：音 tid` tid` tud` tud`；結結巴巴不流利。

臺中市 110 年語文競賽複賽客家語朗讀文章國小學生組（大埔腔）

編號 8 號

【秘密森林】林貴珠原作

佢自細已好在山林肚、河壩脣搞寮，一到寮日斯滿哪野上野下，搞到斷烏正轉屋，記得讀小學該下，總係好珍阿娥厥姆去美濃山下撿樵，阿娥厥爸當早斯過身咧，單淨厥姆做小工來畜歸屋家大細，阿娥已知人我，放寮日總會珍厥姆去山頂撿樵杈相添，佢輒輒擲衫尾，同厥等共下去山林頂寮，對佢來講山林肚全係寶。

打早佢背緊飯包同厥等共下去，在山林肚吾等搞揸迷摸，將這一大片个山林，變做吾等个運動埕躡上躡下¹，在樹頂攀上攀落毋會輸山猴，麼个愁慮早都飛走咧，吾个心情斯像著緊靚靚个花裙在該跳舞个蝶，飛上飛下恁自在、恁快樂，走都汗流脈落斯去山坑脣搞水，山坑水清又清、淋一口透心涼，坑水涼又甜，較贏雜貨店个枝冰，珍緊貶石頭捉蝦公、捉老蟹、捉魚，唱吾等自家个山歌，快樂个歌聲珍坑水傳去歸山坑，流過莊頭，流到闊茫茫个天際。

成半下膨尾鼠來作伴，厥个面頰卵蠕蠕動看核吾等手頂个嘴

嗒，錫都佢口涎水硬硬會跌落來咧，實在得人惜，還有領領拜个山狗太，佢看佢，佢看佢，成半下還會四腳惹天當生趣，行到笏竹蒲下聽著唧唧唧个聲說；吾等將手頂空罐裝湊个水，灌入地泥个空肚，無幾久斯看著另外一個空土狗鑽出來，一隻、兩隻一半下使得灌著三、四隻土狗，搞癢咧坐在香絲樹下，山風柔柔吹過樹林，聽土狗唧唧滾鋸弦，山坑水同笏竹合奏出大自然个樂曲，這係盡錫人聽个樂曲。

樂暢个時間總係恬恬偷溜過，一瞞目斯到斷烏愛轉屋咧，猴嫲背緊細猴子攀籬吊壁愛轉竇，吾等斯踏緊霞痕落山，貓頭鳥咕咕滾同吾等講「正來寮」，阿伯姆核核湊个幸福，佢也袋緊湊个快樂轉來，勞歷這粒山林加添佢生趣又無共樣个童年，感謝一路里來陪緊佢成長个好山好水，對佢來講搞上搞下毋當美濃山下，這係吾心肝肚盡靚个秘密森林。

¹ 躡上躡下：音 liung+ shong+ liung+ ha+；跑來跑去。